

KANDUNGAN

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA 43)**

NOTA: [RUJUK PENYATA RASMI HARIAN (HANSARD)]

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG DIJAWAB DI DALAM DEWAN (SOALAN NO. 1 HINGGA 9)**

**NURELFIRA BT MOHD DAUD
CAWANGAN PERUNDANGAN
PARLIMEN MALAYSIA**

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KETIGA BELAS**

PERTANYAAN : LISAN

DARIPADA : TUAN NIK MOHAMAD ABDUH BIN NIK ABDUL
AZIZ [PASIR MAS - PAS]

TARIKH : 24 NOVEMBER 2014 (ISNIN)

SOALAN (NO. 10)

Minta **MENTERI BELIA DAN SUKAN** menyatakan punca-punca kegagalan Malaysia mencapai sasaran pingat emas dalam Sukan Komanwel 2014 termasuk kemerosotan sukan-sukan utama negara seperti hoki dan badminton.

JAWAPAN

Yang di-Pertua,

1. Untuk makluman Ahli Yang Berhormat, di temasya Sukan Komanwel Glasgow 2014 pada yang lalu, Kontinjen Negara gagal mencapai sasaran **7 pingat emas** dengan hanya memungut **6 pingat emas, 7 pingat perak dan 6 pingat gangsa** untuk menduduki tangga ke-12 daripada 71 negara yang mengambil bahagian.
2. Empat (4) sukan yang telah menyumbangkan pingat emas iaitu badminton (3), terjun (1), angkat berat (1) dan skuasy (1) merupakan sukan-sukan utama yang dipertandingkan di temasya Sukan SEA, Sukan Komanwel, Sukan Asia dan Sukan Olimpik (kecuali skuasy).
3. Kegagalan negara mencapai sasaran pingat adalah berpunca daripada kegagalan beberapa jenis sukan mencapai sasaran awal yang telah ditetapkan. Sukan tersebut ialah berbasikal dan lawn bowls. Sungguhpun sasaran yang telah ditetapkan awal adalah dibuat berdasarkan kepada pencapaian sebenar mereka serta perbandingan dengan atlet-atlet negara lain tetapi atlet berkenaan tidak mampu memberikan pencapaian mereka sebenar. Selain daripada itu kecederaan Dato' Lee Chong Wei dan Pandalela Renong juga menyebabkan kita terlepas pingat emas.

4. Sungguhpun temasya Sukan Komanwel merupakan yang ketiga terbesar selepas Sukan Olimpik dan Sukan Asia, namun dari segi kualiti bagi sesetengah sukan yang dipertandingkan adalah bertaraf Olimpik dan dunia seperti berbasikal, bola jaring, boling padang, hoki, olahraga, ragbi dan renang.
5. Walau bagaimanapun, pihak Kementerian sedang dalam proses menilai keberkesanan program latihan sukan prestasi tinggi khususnya Program Elit 2011-2014 Majlis Sukan Negara. Pihak kementerian telahpun menerima laporan 'post-mortem' daripada semua persatuan sukan kebangsaan yang terlibat. Satu kajian menyeluruh akan dibuat bagi mengenalpasti punca-punca sebenar mengapa atlet-atlet negara gagal menyerlah di temasya sukan antarabangsa.
6. Penyertaan badminton masih dianggap cemerlang kerana mampu mencapai sasaran dengan 3 pingat emas walaupun ketiadaan Dato' Lee Chong Wei yang mengalami kecederaan. Tiga (3) pingat emas tersebut diperoleh menerusi pasukan campuran, beregu lelaki Tan Wee Kiong dan Goh Wei Shem serta beregu wanita Hoon Kee Wei dan Vivian Ho.
7. Prestasi pasukan hoki telah dilaporkan mengecewakan kerana tewas dengan jaringan yang besar dalam dua perlawanan, 1-8 kepada England dan 1-6 kepada New Zealand di samping kekalahan yang memalukan 2-4 kepada pasukan Trinidad & Tobago. Pasukan Hoki Negara berjaya menewaskan pasukan Kanada 2-0 di perlawanan pertama dan menewaskan Scotland 2-1 di perlawanan penentuan tempat ketujuh dan kelapan,

perlawanan-perlawanan yang lain tidak menunjukkan prestasi sebenar pasukan negara.

8. Pasukan hoki lelaki yang menyertai temasya Sukan Komanwel adalah pasukan campuran pemain-pemain senior dan junior. Sebahagian besar pemain-pemain senior direhatkan bagi persediaan untuk menghadapi Sukan Asia di Incheon. Keutamaan diberikan kepada Sukan Asia kerana juara temasya berkenaan akan layak secara automatik bertanding di Sukan Olimpik Rio 2016.

Sekian, terima kasih.

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. DATUK RAIME BIN UNGGI [TENOM]

TARIKH : 24.11.2014

SOALAN :

Datuk Raime bin Unggi [Tenom] minta **MENTERI PENDIDIKAN** menyatakan keadaan reka bentuk bangunan sekolah rendah dan sekolah menengah tidak lagi selamat seperti mana dakwaan pihak tertentu dan berapa kes kematian pelajar yang jatuh dari bangunan sekolah pada tahun 2011, 2012, 2013 dan 2014.

JAWAPAN

Tuan Yang di-Pertua,

Reka bentuk bagi pembinaan sekolah-sekolah di bawah Kementerian Pendidikan Malaysia (KPM) sememangnya mematuhi piawaian dan standard keselamatan yang digariskan oleh Jabatan Kerja Raya dan Jabatan Bomba dan Penyelamat. Dalam penyediaan reka bentuk sekolah, aspek keselamatan murid sentiasa diberikan penekanan.

Untuk makluman Ahli Yang Berhormat, berkaitan dakwaan tentang kes kematian murid yang jatuh dari bangunan sekolah, insiden ini mungkin disebabkan oleh faktor-faktor lain. Setakat ini, KPM tidak menerima sebarang aduan berhubung kematian pelajar yang jatuh daripada bangunan baharu. Walau bagaimanapun mengikut data KPM, kes-kes berkaitan pelajar yang jatuh bangunan yang dilaporkan pada tahun 2013 ialah 7 kes, manakala tahun 2014 ialah 8 kes. Tiada kes dilaporkan pada tahun 2011 dan 2012.

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Dr. Michael Jeyakumar Devaraj
[Sungai Siput]

TARIKH : 24 November 2014 (Isnin)

SOALAN : Dr. Michael Jeyakumar Devaraj [Sungai Siput] minta **MENTERI PERTANIAN DAN INDUSTRI ASAS TANI** menyatakan sama ada Kerajaan bersetuju bahawa pekebun kecil Cina yang usahakan tanah Kerajaan tanpa memperolehi geran tanah ataupun "lease", sedang memainkan peranan penting dalam menjaminkan pembekalan makanan sayur-sayuran di Malaysia. Apakah langkah-langkah yang sedang diambil untuk memantapkan sumbangan mereka.

JAWAPAN :

Tuan Yang Dipertua,

Kementerian Pertanian dan Industri Asas Tani tidak mempunyai kuasa berkaitan pemberian geran tanah atau pun "lease" kepada pekebun kecil Cina yang mengusahakan tanah Kerajaan tanpa kebenaran memandangkan urusan berkaitan hak milik tanah adalah di bawah tanggungjawab Kerajaan Negeri. Bantuan Kerajaan juga tidak dapat disalurkan memandangkan salah satu syarat pemberian bantuan adalah pemilikan yang sah atau dokumen sokongan kebenaran mengusahakan tanah tersebut.